



Impactful Women Project

Get to know #ImpactfulWoman of this month [Evelyn Wever-Croes](#)! (Interview in Papiamentu).

IMPACTFUL WOMAN



Evelyn Wever-Croes

- Cu 22 aña a gradua como "Meester in het Fiscaal Recht" na Rijksuniversiteit Leiden
- Na 2008 a huramenta como abogado
- A dreña politica den 2009
- Na 2017 a bira prome ser fememino cu a tuma e puesto di Minister President
- Gusta canta den su tempo liber



Ken ta Sra. Evelyn Wever-Croes na banda di e mundo di politica?

Wel prome cu politica mi tabata mama, wela, ruman, tanta, yiu, amiga manera cualkier otro persona, y asina mi lo ta despues di politica tambe. Mi ta un profesional den e area di ley y impuesto, y mi ta dedica mi tempo liber na sirbi mi comunidad. Aparte di esaki mi ta un persona cu un fe grandi. E 4 areanan aki ta crea e balance den mi bida: famia, trabou, servicio y fe.

Mi ta un persona cu ta stima mi isla, cu nunca no ta bira lomba pa niun reto, y semper cla pa enfrenta tur, dunando cara na pueblo di Aruba. Mi ta un persona cu ta kere nos mester atende tur cos cu seriedad y hopi serenidad y semper keda focus riba e meta, si bo no a logra awe "regroup" y continua mañan, pero nunca give up.

Sra. Evelyn Wever-Croes tin hobby cu ta hasi den tempo liber?

E ultimo añanan aki no tabata tin mucho tempo liber, pero si mi tin tempo liber mi ta gusta lesa un bon buki, of landa. Canta tambe ta un di e cosnan cu mi ta gusta haci.

Ki estudio Sra. Evelyn Wever-Croes a(ta) haci(haciendo)?

Cu mi 22 aña, na aña 1989, mi a gradua como "Meester in het Fiscaal Recht" na RijksUniversiteit Leiden. Y na aña 2008 mi a logra e extra examen nan cu a permitimi huramenta como abogado.

Con Sra. Evelyn Wever Croes a drenta e mundo di Politica?

Mi a lanta den un famia serca di politica. Betico Croes tabata mi omo y padrino. Mi tata, Hendrik Croes, tabata vakminister algun biaha pa Antiyas y Aruba, y mi tin mas famia cu tabata y ta den politica. Pero ami mes a bisa cu mi no kier drenta politica.

Mi kier a studia, traha, haya yiu y dedicami na famia, cual mi a haci tambe.

Te 12 anja pasa ora mi a wordo aserca door di ex lider di MEP Nel Oduber pa drenta den politica. Na prome mi a nenga rotundamente y constantemente, pero despues di 6 luna nengando mi a realisa cu mi no tabata sintimi bon cu mi mes. Semper mi tabata critico di tur gobierno, y awor mi ta haya e oportunidad pa drenta politica y duna mi contribucion, y mi a realisa cu mi no por core pa e reto, y na mei 2009 mi a duna mi 'Sl' na politica. Mi casa y mi yuinan tabata un sosten grandi pami den e paso aki.

Con Sra. Evelyn Wever-Croes ta balancea bida familiar y ta e Prome Minister di Aruba?

E no ta facil, e trabou di Prome Minister ta exige hopi tempo, energia y atencion, y lamentablemente hopi sacrificio di tempo cu mi famia, pero danki na mi casa Kenneth cu semper ta apoyami, y agradecido na mi yuinan pa tur sosten, mi ta logra e balance y ta logra 'quality time' cu mi famia. E sacrificio cu mi casa, mi yuinan, mi mayornan y mi ruman ta hasi, ta hopi grandi si, y mi ta spera cu Dios dunami bida y salud pa mi por recobra e tempo aki cu nan bek na un forma of otro, despues cu mi sali di politica.

Sra. Evelyn Wever-Croes tin otro reconocimiento/logronan na su nomber? Y den kiko esakinan ta?

Mi a haya reconocimentonan den mi carera como fiscalista, pa mi trabou como politico femenino y pa e trabou cu mi ta haci den comunidad. Mi no ta haci e trabou pa haya reconocimiento si.

Sra Evelyn Wever-Croes ta miembro di algun instancia caricativo?

Mi ta miembro di Quota International of Aruba pa 23 aña, maske ultimo tempo mi no ta hopi activo, debi na e intensidad di e trabou como Prome Minister. Pero ora por, mi ta participa.

Sra. Evelyn Wever-Croes tin un mensahe pa e hende muhernan (Hoben/ 'Young professional') di Aruba?

Hende muhernan por hopi mas di loke algun di nos ta kere cu nos por. Nos por tur loke nos propone nos mes, pasobra nos ta trese otro caracteristicanan na mesa. No permiti ningun hende ponebo sinti cu bo no por.

Fiha bo meta den bida, y bai p'e. No laga nada desviabo di dje.

Y nos mester di mas hende muher den politica, pa trese e balance den decisionnan ehecutivo, cu ta tene mihor cuenta cu e necesidadnan di nos muchanan, especialmente nos mucha muhernan, y cu e necesidad di nos hende muhernan. E no ta facil, pero nada den bida ta facil.

Impactful Women Project is a WOW Aruba initiative to highlight empowered women who realized their dreams by impacting our community and paving the way for many after them.

Do you know any [#ImpactfulWoman](#)? Send us her info!

As we let our own light shine, we unconsciously give other people permission to do the same. - NM

WOW Aruba

Women empOwering Women

wowarubainfo@gmail.com

<https://www.wowaruba.org/>

